



9. agusti 2011

TUSAGASSIORFINNUT NALUNAARUT

Atuarfeqarnermi suliniutissat pingaartut ilaat

Illoqarfinni nunaqarfinnilu atuarfinni 80-iusuni ukioq atuarfiusooq nutaaq ulluni makkunani aal-lartisarneqaleruttoq, tamannalu tunngavigalugu eqqarsaatit qaffakaapput atuartitsinnermut tunngasuinnaanngitsut, aammali atuarfiup angerlarsimaffiullu attaveqatigiinnerannut tunngasut – meeqqat atuarfiini suliniutissat pingaartut ilaat pillugit eqqarsaatit.

Tamatta isumaqatigiissutigisinnaavarput atuarfik tassaasariaqarmat ilinniartitaanerup inuiaqatigiinnut namminersortunut piunasaqaatinut tulluurtup tunngavia qajannaatsoq. Taamaattumik atuarfeqarnermi sulisorititatta ukiullu tamaasa aningaasaliissutigisartakkatta qanoq atorluarneqartiginerat missoqqissaassallugu pisariaqarpoq.

Nunami maani ilinniarluarsimasunik ilinniartitsisorpassuaqarnera nuannaarutigaarput. Ilinniartitsisullu taakkua piginnaassusiisa inuiaqatigiinni meerartaasunut tamakkiisumik iluaqutaanissaat soqutigisarilluinnarparput.

Ilinniarsimasunik ilinniartitsisoqarnerup meeqqat atuarfianni angusat qanoq ittuunnerannut apeqqutaalluinnartarnera paasereersimavarput. Taamaattumik nalunaaqquttap-akunneri amerlanerusut atuartitsinivimmu atorneqarsinnaaqullugit nukit qanoq pitsaanagerusumik atorneqarsinnaanerit pillugu ilinniartitsisut oqalliseqatigerusunnarput. Isumagisassat allaffissornermut tunngasut annikinnerpaaffissaanniittariaqarput, ilinniartitsisutut suliasaviit nakkutigilluarneqarnerusinnaaniassammata.

Aamma taamatut eqqarsarlunga ilinniartitsisut kattuffiata IMAK-ip sinniisoqarfiata juunimi ataatsimiinnerani aperivunga atuarfeqarnerup siunissaa pineqartillugu aamma atuarfinni aqut-sinikkut aqqissuussineq eqqartussallugu piffissanngunnginnersoq: Ilinniartitsisut atuartitsineq nakkutigilissuk, allaffissornikkut aqutsineq allaffissornerup tungaatigut ilinniarsimasunit isumagineqassamat.

Tassa meeqqat inuusuttuaqqallu sullinneqarneranni anguniakkat piviusunngortinniarnanni atuarfik ilinniartitsisullu pingaaruteqartumik inissisimaffeqarput.

Meeqqat inuusuttuaqqallu pillugit suliniutit nutaat tamakkiinerusumik malittareqqikkumallugit KANUKOKA ulluni 11.-13. septembari 2011 Sisimiuni kommuninit tamanit peqataaffigineqartumik isumasioqatigiissitsiniarpoq. Isumaginninnermi atuarfeqarnermilu ataatsimiitaliani siulittaasut ingerlatsivinnilu pisortat tamatumunnga aggersarneqarput. Neriuppugut isumasioqatigiinnissami tassani politikkikkut ataatsimoortumik aqqiissutissanik siunnerfiliisoqarumaartoq.

Nunatsinni meeqqat 800-it missaanniittut qaammammi uani atualeqqaassapput. Atualeqqaat tamaasa matumuuna pilluaqqumavavut.

Atuarnerup aallartinnera aamma angerlarsimaffiup atuarfiullu suleqatigiinnerata aallartiffigisariaqarpaa.

Angajoqqaat atuarfimmik suleqatiginninnissaminnut soqutiginninngippallaarnerat ukiut ingerlaneranni maalaarutigineqartarsimavoq. Angajoqqaat ataatsimiisinneqartarnerinut orniguttartut taakkuinnaajuartarnerat ilaatigut maluginiarneqartarsimavoq. Tamanna qanoq allannngortissinnaavarput? Angajoqqaat atuartitsinermut atuarfeqarnermullu isummersoqataanissaannut kajumissaassallugit kommunit atuarfiullu pikkorluppallaarpugut?

Naluneqanngilaq angajoqqaat meeqqamik atuarfimmi qanoq ingerlanerannik soqutiginninnerat – meeqqamik ajunngitsumik pinissaannik kissaateqarlutik iliuuseqartarnerat – angusaqarfiullu arajuttoq.

Angerlarsimaffiup atuarfiullu suleqatigiinnerat inuiaqatigiinni ilinniagaqarnermik siuarsaanermut nalilerujussuuvoq – allaammi koruuninit millionerpassuarmit nunatsinni ilinniagaqarnerup immikkut ittumik siuarsagaaneranut ukiut tamaasa aningaasaliissutigineqartartunit naleqarnerusutut oqaatigineqarsinnaalluni.

Taamaattumik meeqqat inuusuttuaqqallu isumagineqarnerata ineriartorteqqinneqarnissaani angajoqqaat atuarfiullu suleqatigiinnerata eqqumaffigilluarneqarnissaa KANUKOKA-p kajumissaarutigerusuppaa. “Atuarfitsialaap” ineriartorteqqinneqarnerani soorlu angajoqqaanik ataatsimiisitsisarnerup oqaloqateqartarnerullu qanoq inuit suliffeqarnerannut, ileqquinut pisariaqartitaannullu naleqqussarneqarsinnaanerat misissortuartariaqarpoq.

Inussiarnersumik



Martha Abelsen
KANUKOKA-p siulittaasua